

2454
H A R A N G V E

E T

R E M O N S T R A N C E

P R E S E N T E E S A V R O Y

P A R L E C E N S E V R C A T O N

sur les affaires de ce temps.

M. DC. XIX.

THE NEWBERRY
LIBRARY


Case

F

39

.326

1619c



HARANGVE PRESENTE'E

au Roy par le Censeur Cathon, sur
les affaires de ce temps.

SIRE,

L'affection de vos bons & fidelles subiects ne leur a permis de demeurer d'auantage en silence, sur le subiect de la Guerre qui se presente, à laquelle ceux qui sont pres de vostre personne la veulent porter, & le dessein que la Royne vostre Mere sans le consentement de V. M. est sortie de Blois, & s'est retirée à Angoulesme, quoy qu'on mette dans les esprits des peuples qu'es est pour la rebellion commise par Monsieur le Duc d'Espemon: ces choses SIRE, on fait entrer en consideration tous les bons François, qui se seroient allé ietter à voz pieds, pour luy représenter le danger auquel vous mettés vostre Estat, si vous suyuez les passions de ceux qui iusques à present vous ont tenu comme esclau en la cognoissance de vos affaires, car ils ont bien ozé (SIRE) & personne ne le peut mieux scauoir que vostre Majesté, que depuis l'absence de la Royne vostre Mere, personne ne vous a ozé approcher que premierement ils ne se soient fait cognoistre à eux, voire d'auantage que si quelqu'un de quelque qualité qu'il ay t esté voulât par-

A ij

ler à vostre Majesté, vn d'eux qui n'ont point abandonné vostre personne portoient l'oreille pour sçauoir ce qu'on luy disoit: Auoir par le moyen de leurs actions esloigné voz Princes & principaux Seigneurs de vostre Cour, tenu comme prisonniere la Royne vostre mere: Auoir mis en compromis la vie & l'honneur de plusieurs personnes de qualité qui parloient du mauuais traitement qu'elle receuoit, deffendu à toutes sortes de personnes de la voir, tenir des Espions pres d'elle sans son feu, pour les tenir aduertys de ce qui se passeroit pres de sa personne: Auoir balloté le Gouuernement de vos Prouinces, les acheter aux despens de vostre Majesté, en oster ceux que le feu Roy Héry le Grand y auoit estably, ne s'estre pas contenté d'une despoille si aduantageuse que celle que vous leur donnaistes il y a deux ans: Mais encores depuis ce temps là ils se sont rendus maistres de toutes vos finances au preiudice de plusieurs personnes de qualité, au preiudice aussi de vos gens de guerre tant de Pied que de Cheual: Et que l'assemblée des notables que le seul mot nous faisoit promettre la continuation de la paix que V. M. avec l'ayde de la Royne vostre mere a acquis à ses peuples, en establiant vn bon ordre pour lequel vous les auiez conuoqué, & regler tellement voz finances que dans peu de temps V. M. eut eu de quoy aller replanter la Croix sur le Mont caluaire où le Sauueur du monde l'y a premierement fait paroistre pour nous faire iouir d'une vie plus heureuse que celle dans laquelle nous viuons: C'est ce qui estoit attendu de tous les Chrestiens à l'imitatiō de vos Predecesseurs, & les vœux des gens de

5
bien leur faisoit esperer ce saint exercice, pour la conqueste de ce sacré lieu que les ennemis de son nom possede: mais cest espoir s'est auorté à sa naissance, puis que ceste assemblee ne fut que pour les authoriser dans leur Gouvernement, & que l'espargne qu'ils ont faicte à esté pour remplir leur bource: Car on dit maintenant que V. M. n'a pas vn sol, aussi a il fallu sur le bruit de ceste guerre recourir aux Edicts & à l'emprunt: on n'a pas laissé pourtant en ce S. temps accompagnât nostre Seigneur à la Croix de faire la mesme priere qu'il fit pour ceux qui le crucifioient, Seigneur pardonne leur car ils ne scauent ce qu'ils font.

Et pour faire cognoistre ces choses veritables à V. M. elle est tres-humblement suppliée de considerer l'estat auquel le feu Roy Henry le Grand vous a laissé, lequel auoit donné l'alarme, non pas seulement aux Chrestiens, mais encore à l'infidelle, qui tenoit pour assuré, que s'estant assuierty toute l'Europe à l'exemple d'un Charles Magne, eux n'auroiét pas de quoy resister, & auoient desia desseigné de ce venir jetter à ses pieds, & le recognoistre pour le plus digne Monarque de tout le monde, & le plus capable de regner. Ouy ils l'eussent fait (Sire) puis que les murailles de l'Italie & de l'Allemagne commençoient à cheoir au seul bruit de ses armes, & les portés demeuroient sans clefs puis qu'on les faisoit porter aux pieds de ce Grand Roy.

Voilà donc (Sire) tout le monde en arme & en alarme, le Comte de Fuentes mesme qui n'a-

uoit appris à cognoistre que la gloire & l'ambition de ces Rois, publioient que les desseings de ce grand Prince ne pouuoient receuoir de l'obstacle que par vn coup de malheur: aussi (Sire) n'a il esté que trop vray, car sans cest avorton de Nature il s'en alloit prendre possession des terres Estrangeres, & se rendre esclau tous les Rois de la terre, pendant qu'il laissoit V. M. croistre en aage avec la sage conduite de la Royne vostre mere, qu'il vous laissoit pour Tutrice & Regente de ce Royaume, ainsi l'auoit-il qualifié quelques iours auparauint ce detestable coup, quand la conduisant de sa chambre au cabinet, & s'estant arresté pour parler à quelqu'un, il luy dit, passez, passez, Madame la Regente.

Considerés donc (Sire) combien de peuples sont picquez, avec tous vn desir de vengeance, dans laquelle il leur sembloit estre desia dedans par le detestable coup arriué à ce Monarque: Les voila dis ie (Sire) à batir des desseings pour jouer sur vostre Estat comme sur vn Theatre l'effect de leurs mauuaises volôtez: A quoy la sage prudence de la Royne vostre mere apportat tant de soin parmy les larmes & les sanglots qu'elle iettoit de la perte qu'elle venoit de faire, qu'ils n'ont eu que le repentir d'auoir ozé mal penser, & que si nous auions perdu vn grand Roy, vne grande Royne nous estoit demeurée: Aussi à mesme temps elle fait donner ordre pour la seurte de vostre personne, enuoye querir tous les Gouverneurs des Provinces, Places, & Fortereses, leur fait prester le

Serment de fidelité, & les enuoye chacun en l'exercice de leur charge, fait que les troupes qui estoient sur pied soient cōseruees dans leur deuoir, & fait proceder à la formation du procès de ce demon incarné.

Et pour mieux affermer vostre Royaume, & empescher que les esprits Brouillons n'eussent paroistre durand vos ieufnes ans quelque effect de leur malice, elle fut conseillie de rechercher l'alliance d'Espagne, elle communique c'est aduis à tous vos Princes, Ducs, Pairs, & officiers de vostre Couronne, qui tous le trouuerent bon, prierent la Royne vostre mere d'en faire la demande, & d'en donner les assurances necessaires, & pour cest effect Monsieur le Duc de Mayenne fut le porteur de ses parolles vers le Roy d'Espagne

Et parce que le vray & plus seur moyen de regner est de conseruer la iustice dans sa dignité, elle enuoya à tous les Parlements de se maintenir dans le seruice qu'ils doiuent à V. M. & de tenir les peuples dans leur deuoir. Et apprehendât que la liberté du port des armes ne causast de la broüillerie, fait vn Edit portant deffences du port d'icelles, & parceque la licence du jeu, & des Berlans, s'estoit si fort establie qu'outre que Dieu y estoit grandement offencé par le moyen des blasphemies qui si proferoient, & aussi que la pluspart de vōtre noblesse & autres vos subiects se ruinoient, elle fait deffendre lesdicts jeux, Berlans, & blasphemies, fait deffendre les duels & rencontres avec tant de zele & affectiō, qu'on ne recognoissoit point de changement en vo-

stre Estat, que le dueil qu'on portoit de la perte d'un si grand Roy, & que les desseins de la guerre estoient conuertis en prières pour l'accroissement de vostre Maïesté, & pour la conseruation de vostre Estat.

Pendant que d'un costé la Royne vostre mere à le soing de vous faire donner la cognoissance qui est necessaire à un grand Roy qui doit un iour seigneurier la terre, de l'autre elle tasche d'estaindre le feu que la diuersité des Religions vouloit allumer, à quoy incenssiblement on nous vouloit porter par le moyen de certains liures qu'on faisoit imprimer en année 1612. & 1613. à quoy la sagesse apporta tout le remede que l'affection de vous conseruer vostre Estat en paix, luy pouuoit permettre, mais comme il falloit que la posterité cogneust le zele d'une bonne mere, & que toutes les choses du monde n'ont esté capables de la faire consentir à la diminution de l'autorité qui vous estoit deüe, tant de l'une que de l'autre religiõ, voyla (SIRE) que ses esprits qui ne pouuoient viure dans la tranquillité poullez par l'ambition de s'affranchir attire a eux les volontés des Princes qui sous des foibles raisons prennent les armes. A quoy la diligence qu'apporta ceste grande Princeesse d'estaindre ce feu est admirable car c'est en cecy ou il faut aduouer en despit des langues mesdizantes que son desseing n'a iamais esté autre, que la conseruation de vostre autorité & de vostre Estat, car aussi tost elle enuoya sçauoir le subiect de leurs plainctes, les assure qu'elle taschera avec toute sorte passion de les contenter, qu'ils
fissent

fissent consideration que la guerre est la ruine du peuple, ils mettent par escrit quelques plaintes, pour auxquelles remedier, ils demandent vne assemblee des Estats generaux, elle là leur accorde, les voyla doncq mandé, on ne laisse pas pourtant de faire quelque escápade en Poitou, & en Bretagne, dabort pour conseruer les peuples dans le respect deüe à vostre Majesté. Elle luy fait faire le voyage, & en ceste action aussi bien qu'aux precedentes & suiuautes, on ne remarque en ceste Princesse qu'une grande douceur & clemence, s'est que sans respandre vne goutte de sang, toutes les broüilleries sont appaisees, & tout le monde ne respire que vostre seruice.

Ce voyage estonna grandement les auteurs d'un grand dessein que l'on auoit sur vostre Estat, d'où la cognoissance en eust esté grandement aueree, si vn Prestre qui venoit d'Italie, & qui fut tué aupres du Tarare en Lionnois, fut peu arriuer en cette ville, ou si la Mallette dans laquelle estoient les memoires de ceste grande conspiration eust esté apportée, mais elle fut enuoyée à vn Banquier Piedmontois qui se tenoit a Lyon, par ceux qui assisterent à ce meurtre, lequel à l'heure mesme l'emporta en son pays: Vous auriés veu (SIRE) ceste grande Caballe & comme vous le pouuez scauoir de la Roync vostre Mere, que si ceste grande Princesse n'y eut remedié par vne prudence admirable, on vous eust rendu le plus miserable Roy de la terre, & que quand en vous voudroit ré-

dre les déclarations qu'elle vous en feroit suspectes vous pourrez auoir recours à la procedure que ce sacré Senat, cest Auguste Parlemēt fit aux complices de ce meurtre, qui furent executez en l'année 1614. Dequoy veritablement (SIRE) on ne pourra iamais rendre assez d'actiōs de graces à ceste grande Royne, & particulièrement V. M. de vous auoir escript ce mal-heur, le temps à venir vous en donnera vne parfaite cognoissance qui vous fera haïr auēc des passiōs extremes ceūx qui possèdent voz volonte, vous ont iusques à present rendu ces actions odieuses par les plus manifestes faussetez qui se pourront iamais imaginer : les plus clairvoyans pourront iuger de ceste verité par ces premiers mouuemens, & par la suite d'iceux.

Comme vostre Maieité fut de retour de Bretagne, la Royne vostre Mere voyant que vous estieś assez fort pour gouverner vostre Estat, elle se despoūille de sa Regēce, vous remet la charge du Gouvernement : Ce qu'elle fit sans y estre aucunement portée que par les loix de l'amitié & du respect qu'elle vous a tousiours porté, elle fait publier son dessein, tous les Princes & grands Seigneurs se rendent pres de vostre personne pour l'assister en vn acte si celebre : Vous voila donc Majeur, vous voila en main les renes pour la conduite de vostre Royaume.

Ce ne fut pas encoré tout fait, l'on commence de nouueau à murmurer la Royne vostre Mere qui auoit estein la flamme, mais les charbons estoient encores rouges du feu de l'ambi-

tion, il y falloit mettre l'eau de sa prudence, ce qu'elle fit: Elle fait donc presser l'assemblée des Estats, les voila arriuez dans Paris, à l'ouverture desquels elle leur fait proposer le dessein de V. M. leur rend s'il est permis de dire compte de son administration, les exhorte comme bons & fidelles Subiects de remedier aux desordres de l'Estat s'il y en a, & d'apporter le remede qu'ils iugeront en leurs cōsciencies pour la conseruation de vostre Authorité & de vostre Estat, & sur tout luy donner leurs bons & salutaires aduis.

Les Estats trauaillent à voir les plaintes de Messieurs les Princes, mais les Seditieux qui ne demandoient qu'un moyen pour se mettre en liberté comme ils voyoient que les Estats approuuoient la Regence de la Roynne vostre Mere, & que iustement & sainctemēt elle auoit consenty au Mariage de V. M. & de Madame vostre Sœur, qu'elle deuoit effectuer ses promesses, & en suites des parolles venir aux effets, les voila qui se trouuent priuez de leur dessein par vne assemblée des plus qualifiez de la Frâce, ils taschent de rompre le col à leurs sainctes resolutions, en faisant proposer vn Article par le tiers Estat, comme le plus susceptible & capable de nouueauté, qui n'estoit que pour mettre vn Chisme à l'Eglise, & nous ietter dans le malheur où l'Angleterre a esté par tant d'années: Ce qu'estant consideré par les Desputez Ecclesiastiques & par vostre Noblesse, & iugeant le grand mal qu'une telle creance pouoit ap-

porter à vostre Estat, ilss'opposerent à ce que ledit Article ne passast point, ce qu'estât aussi recogneu par V. M. par les saincts Conseils de la Royne vostre Mere, vous auries esuocqué à vous & à vostre propre personne le fait dudit Article, leur fait inhibitions & deffences d'en parler cy apres, les Estats baillent leurs Cahiers & apres se retirent.

Voila la fin des Estats generaux, ceux de la Religion en veulent tenir d'autres, quoy que cela ne se d'eust : mais la Royne vostre Mere pria V. M. les leur accorder pour leur oster tout subiect de plainte, les voila donc à Grenoble, où vous y enuoyastes le sieur Frere vostre Conseiller d'Estat (comme vn de vos plus fideles & affectionnez seruiteurs, l'integrité duquel vous ayant des long temps esté cogneuë, vous l'auries honoré de la charge de premier President en ceste Prouince là) lequel se trouua à l'ouuerture de ladicte assemblée, leur representa qu'ils eussent à ce contenir dans les bornes de l'obeissance que les fideles Sujets doiuent à leur Prince, mais comme ils virent que le sieur Marechal Desdiguieres, prenoit, garde à leurs actions, & qu'il ne souffriroit pas, comme il n'a jamais fait, que rië se passast au preiudice de vostre authorité & de vostre seruice, les voyla qui sans rien resoudre sans la permission de vostre Maiesté, ils quittent Grenoble sans dire mot, & se rendirent à Nimes où vous leur enuoyastes dire que ce n'estoit pas traicter en subiects, mais neantmoins la Royne vostre Mere qui na ia-

mais tesmoigné que le desir de la tranquillité publique, pria vostre Majesté de leur estre meilleur Roy qu'ils ne vous estoient bons subiects, ce ne fut pas tout, car quand ils sceurent que vous esties resolu de faire le voyage, les mauuais Religionnaires, firent glisser dans l'e'prit des Princes, qu'il y alloit du leur de souffrir ce mariage, & pour cet effet leur office & leurs vie, & leurs biens, les asseurent que tout le corps se ioindra à eux, & mesme le Roy d'Angleterre, qui fournira d'hommes & d'argent, & tur ses belles promesses Messieurs les Princes qui ne cōsideroient pas à quel dessein ses parolles leurs estoient portees. Ce retirent de la Cour recourrent aux armes, & à l'Estranger on enuoye à la Rochelle, & en Angleterre pour les sommer de tenir parolles, Monsieur de Courteney qui auoit esté mandé pour ce subiect s'en reuint plus chargé de belles parolles que d'argent, ceux de la Rochelle voyant leur partie n'estre pas assez forte desaduoiuent les parolles qu'on leur auoit donné, si que se trouuant embarqué dans ces desfaueus, on a recours aux liurets & manifestes avec des blasphemess detestables, qu'autres que François ne les pourroient auoir faicts, dequoy l'estranger faisoit leur profit, & n'auoient en la bouche que nostre honte & nostre confusion.

La Royne vostre Mere considerant que ceux qui ne deuoient respirer qu'une parfaicte obeïssance, vouloient fouler au pieds vostre autorité, & de seruiteurs se rendre Maistres, elle porta couragement V. M. au voyage, dit que la

posterité n'aura iamais cest aduantage de dire que vos subiects vous eussent fait commettre vne lascheté, & que vous & vos predecesseurs qui n'ont iamais appris qu'à commander, qu'il fallut que vous cedassiez à ceux qui ne doiuent auoir autre volonté que les vostres: Et pour cest effet ayant mis ordre à vostre ville de Paris auoir baillé vne armee vollante au sieur Marechal de Bois-dauphin pour empescher le plus qu'elle pourroit celle de Messieurs les Princes, à mesme temps vostre Maiesté part de Paris, on n'entend que fulminations, ses tonnerres ne fleschisse point le courage de ceste grande Roynne, toutes vos villes qu'on publioit vous deuoir apporter de la resistance sont ouuertes auec des acclamatios de ioye, en quelques endroits vos ennemis font contenance de paroistre, mais les rayons de vostre presence les offusques & les esblouyt, ils vous laissent le passage libre, & s'en vont d'un autre costé, cependant l'eschange se fait, on ne void par tout que des feus de joye, & cris d'allegresse: mais la Roynne vostre mere considerant que vostre peuple se ruinoit par le moyen des gens de guerre, pria vostre Maiesté d'y remedier pour cest effet on parle d'une trefue & d'une conserance, Lodun est destiné pour ce subiect, & scachant que Madame la Comtesse pourroit par sa prudence apporter vne grande facilité au bien de la paix, & laquelle estoit demeurée à Paris, pour faire esleuer Monsieur le Comte son fils, que son basage n'auoit peu permettre de faire

le voyage : Elle conseilla Vostre Majesté de luy despescher vn Courier pour la prier de se vouloir trouver à ceste conference : elle qui n'a jamais eu autre volonté que de vous servir & l'Estat, elle hazarda dans la rigueur de l'Hyver ce ieune Prince, qui donne esperance à la Chrestienté d'estre vn iour bien fort aggrandie par son moyen : La voila qui se rend dans Lodun, où elle fit cognoistre qu'on ne la cognoissoit pas, où estant Messieurs les Princes baillét par escrit leurs mescontentemens : A quoy V. M. par l'aduis de la Royne vostre Mere, leur accorda tout ce qu'ils demandoient, les rembourse des frais qu'ils auoient faits pour ruiner vostre peuple & pour vous faire la guerre, l'Estranger se retire, mais non pas pour beaucoup de temps, car vous ne fustes pas de retour à Paris, qu'on commence à chercher de nouveaux moyens, on publie que le Marechal d'Ancre se veut faire Roy, que la Royne vostre Mere veut mettre l'Espagnol en France : voila encore le feu qui s'allume, & cōme le premier dessein continué, on veut encor jeter Monsieur le Prince dans la meslée. Vostre Maieité pour certaines considerations le fait arrester dans son Louure, voila d'abort tout le monde en allarme, chacun se retire, on croit la France perdue : Mais cōme Dieu qui en a vn particulier soin pour estre V. Majesté le fils aîné de son Eglise, il permet bien beaucoup de desordres pour manifester sa gloire, en nous conseruant dans iceux aussi celuy qui durant cinq ou six ans s'estoit acquis des

grands moyens, au lieu de prendre exemple à la perte d'un Sejanus, ne vise qu'à sa fortune, se rend insolent dans ses prosperitez, & tellement mesconnoissable qu'il croit qu'on ne ce peut passer de luy, ce veut assujettir tous les Princes & Grands Seigneurs, & comme faire du compagnon avec V. M. Ce que vous ne pouuiez souffrir qu'avec des desplaisirs bien grands, sans neantmoins les faire cognoistre, car on ne l'auroit pas souffert: Mais considerant le malheur de vos peuples, qu'il ne falloit pas que pour un homme tant de gens fussent ruinez (quoy que ce ne fut qu'un pretexte qu'on estoit bien aysé d'auoir) V. M. iustement meue, le voulut faire arrester sur plusieurs plaintes qu'on vous auoit faictes, où voulant apporter de la resistance, il fut tué, voila un homme qui estoit tout, n'estre plus rien, voila le masque leué, & la plus part de Messieurs les Princes qui ne s'estoient retiré & n'auoient prins les armes que pour leur conseruation, se viennent rendre à voz pieds, tout le monde y accourt, pendât que la Royne vostre mere est indignement traitée: voila la Paix faictes, & un exemple à la posterité, que tout homme qui se lairra emporter dans la mesconnoissance, qu'il ne luy en peut quarruiuer de mesme, & que ce que les peuples adorēt aujourd'huy, demain le voudroient auoir desuoré.

Cest exemple n'a pas esté allé fort, car cetuy là ne fut pas descendu, qu'en voila un autre qui monte, lequel pour ne trouuer point d'obstacle dans le cour de ses desseins, porte V. M. à faire

faire dire à la Royne vostre mere de ce retirer à Blois, en quoy SIRE veritablement quoy qu'il ne soit permis de parler des actions de nos Roys si est-ce qu'on dit que ceste action, sa prison dans le Louure, les gardes ostent le bannissement de tous ses seruiteurs & sa captiuité à Blois, a esté trouué extremement rude tant par les bons François que par les estrangers mesme cōsiderant sa grandeur & l'affection qu'elle a tous-jours eue pour la conseruation de vostre personne, de vostre autorité, & de vostre Estat, auoir esté femme d'un grand Roy, & Mere d'un si sage Roy, que l'antiquité & la posterité plaindront de n'auoir cogneu, ouy (SIRE) puis qu'on ne remarque en vous que des actions purement Royales & saintes.

Voyla cest enfant de Phœbus monté sur son char, l'ambition luy fait promettre que quoy qu'il ne se fut iamais meslé que de porter vn oyseau sur le poin, qu'il conduira vn grand Estat, cōme si les maximes de gouuerner des peuples François, estoient aussi aisee qu'à prendre des moineaux a la pipee, & pour seconder leur genereux dessein ils se seruent d'un, qui auoit commencé de bastir sa fortune sur la ruine de son maistre, les voyla Rois. on dit que V.M. n'a plus que le nom: ô que s'il eust bien cōsideré & fait son profit en l'escolle où il auoit esté nourry, il ne seroit pas monté si haut, car la sagesse de se Seigneur qui à iuste tittre est appellé grād, puis que veritablement il a toutes les qualités que l'on peut souhaitter à vn parfait caualier, ouy

qu'il les possede & sans enuie, car il ne s'est iamais perdu dans l'esclat des faueurs qu'il à receu de trois grands Roys, iamais ne s'est mescognu, tousiours modeste dans ses prosperités, on la tousiours veu la courtoisie mesme, & sa vie no^o doit estre vn exemple & à ceux qui nous suruiuront, les voila à trauers châps comme vn Icare, ils portent leurs volontés dans le Conseil qu'ils authorisent du nom du Roy, ils publient qu'il faut reformer l'Estat, & pour ce rendre paisible au peuple, disent qu'il est necessaire vne assemblee de notables, & par ainsi on nous met dans l'espoir d'un grand soulagement. Mais la fin fait cognoistre l'œuvre, car voyant qu'il ny auoit pas beaucoup d'argent dans vos coffres, & qu'ils ne pouuoient faire leurs affaires qu'aux despens d'autrui, iugent qu'il falloit faire des retréchemens, car faire des impositions sur le peuple s'estoit se ruiner, ils font authoriser leur dessein par l'assemblee, & pour commencer on supprime l'annuel, mais non la venalité, & que soubz l'apparence de ce bien, ils peussent plus aisément & sans plainte paruenir au port ou l'ambition leur auoit desseigné de se rendre, si elle en peut trouuer vn: Mais comme à vn beau iour on void esleuer vn orage, de mesmes quelques mescôtens commencent a se plaindre. les pensionnaires de 1616. 17. & 18. se ioignent à eux, disent qu'au parauant leur aduenement, ils estoient payés, la cauallerie legere & le retranchement des gens de pied s'ayde à crier, ny pour cela on ne s'estonne pas, ils changent les Gouuernements, ache-

tent les vns, donnent les autres, en fin ce partages les finances & les charges, les vns veulent estre sur Intendans, les autres Secretaires d'Estat ce n'est pas neantmoins sans quelque diuision entr'eux, si quelque Prince ou grand, gronde, ils les font aller dans leur gouuernement, si on leur donne des soubçons ils mettent des creatures dedans le Conseil, chassent les vieux seruiteurs qui estoient pres de vostre personne & de la Royne, vostre femme, & encor freschement ceste vertueuse Dame Madame la Connestable: & par ce que vostre reuenu n'est pas assés grand quoy que composé de trente six millions de liures, on fait reuendre vos Greffes, on allieue vostre Domaine, on reuend les regratiers, Commisaires des tailles, & garde des petits Sceaux, avec attribution de quatre deniers pour liures de ce qui se leue dans vostre Royaume, d'où l'on attire en vingt-deux mois à ce qu'on dit plus de douze millions de liures, neantmoins pendât ce temps-là, point de gens de guerre sur pied, les pensionnaires point payez fort peu de gens entretenus. Cependant on dit que vostre Maiesté n'a pas vn sol, ce qui est assez aisé à croire puis que Messieurs les Thresoriers de l'espargne vo' ont presté quatre cens mille escus pour leuer des gens de guerre pour aller contre la Royne vostre mere, on blasme si fort ceux qui cherchent la pierre philosophales qui ne l'ôt encor peu trouuer ie les conseille d'aller à leur escolle, car de puis peu ils ont fait quinze cés mille escus, pour acheter le gouuernement de Bretagne, mais ce

changement à vn peu arresté le dessein, & a des-
 tourné la guerre qu'on vouloit faire cōtre ceux
 de Bearn, car il n'y a pas deux mois qu'on fulmi-
 noit contr'eux, & qu'on procedoit à la formatiō
 des procès contre ceux qui auoient assisté à la
 sēblee de la Rochelle sans vostre permission,
 on ne parloit que de les exterminer en cas de
 desobeyssance, mais aussi tost qu'ils ont veu la
 Royne vostre mere hors de Blois, ils vous sont
 venu offrir leurs vie & leurs biens pour luy faire
 la guerre, de refracteurs & rebelles à vos volon-
 tés, les voila les plus obeyssans qui furent iamais,
 on les reçoit à bras ouuert, on auroit volontiers
 escorché le veau gras, puis qu'ils s'offrent à faire
 la guerre à la Royne vostre mere & à ceux qui
 l'ont serui, voila les rebellions pardonnées, on
 n'a assés de fire pour les sceller les voila employé
 à leuer des gens de guerre, mais s'est en cecy ou
 vostre Maiesté doit faire reflexion: s'il luy plaist
 qu'ils ne demandent qu'à remuer, quoy que les
 gens de bien de ceste Religion ny sont nullemēt
 cōsentant: & le seul moyen de les punir, c'est
 de maintenir la paix en vostre Royaume, car ils
 n'ont iamais fait leurs affaires que pendant nos
 diuisions, car à quel subiect armer contre la
 Royne vostre mere, qu'à elle fait, falloit-il que
 pour estre sortie de Blois, vostre Maiesté qui
 estoit à sainct Germain, & ou elle auoit fait des-
 sein de se iourner, s'en reuint tout à coup avec
 tant de precipitation, comme si le Turc eue esté
 aux portes de Paris, & a mesme temps on ne
 parle que de guerre, on n'a assés de papier pour

bailler des commissions, tout le monde à vollé pour en auoir, mais ceste grande ardeur fut vn peu refroidie quand on ne bailloit que deux cés escus pour leuer cent hommes de pied, on dit qu'il faut mettre la Royne vostre mere dans vn cloistre, ou la renuoyer en Florence, & aux autres leur mettre la teste sur vn eschaffaut, & pour ce rendre bons seruiteurs taschent d'imprimer dans l'esprit de vostre Maiesté, des choses si detestables qu'on s'estonne qu'il y ait des bouche si impudentes de vous oser tenir tels discours sans apprehéder quelque iuste supplice, du tout puissant protecteur de l'innocent & de l'oppressé, il est vray que n'est pas eschappe qui traine son lien.

Il est vray (SIRE) que ce grand feu a esté vn peu amoindry par la cognoissance qu'ils ont eu que V. M. commence à faire reflexiõ sur leurs beaux discours, & c'est en quoy Dieu opere miraculeusement en vous; car vous vous estes fasché qu'en l'on continuoît de vous parler mal de la Royne vostre Mere: aussi (SIRE) ne le deuez vous souffrir, car en quoy vous a elle offencé, qu'à elle fait contre l'Estar? Et quoy que V. M. soit vn grand Roy, si n'est-elle pas exempté du commandement que Dieu nous fait d'honorer nos Peres & nos Meres, & de tous les commandemens il ne nous est point promis de recompence qu'en celuy là: Tous ceux qui ont la cognoissance de V. M. iugét bien qu'elle ne traitera point mal sa mere, car iusques icy elle n'a pas receu les recompencés des

bons & fideles seruices qu'elle vous a rendu & à vostre Estat. Il y a des broüillons & des langues de Diabie qui disent, n'a elle pas plus que iamais Royne de France n'a eu, que veut-elle venir faire à Paris: En cela (SIRE) tous les gens de bien desplorent sa condition, c'est que personne ne vous oze parler d'elle, chacun craint la faueur, car iamais Royne n'a fait en France ce qu'elle y a fait: elle vous a conserué & vostre Estat durant six ans avec des peines & soins nonpareils, s'estre acquis la haine de beaucoup de personne pour maintenir vostre autorité, admirée de tout le monde en sa Regence, les Estrangers mesmes ne pouuoient assez louer sa vertu, & pour recompence elle fut prisonniere dans Paris, sortie avec honte & ignominie, auoir banny tous ses seruiteurs, & ce qu'il luy a plus donné au cœur, l'auoir priué de la veüe de vostre Majesté & de Monsieur & Mesdames ses enfans, & maintenant qu'ayant creu que vous n'estiez pas aduertie de ce mauuais traitement, & qu'on luy auoit deffendu de ne se promener qu'à vne lieue de Blois, comme elle a tasché de cemetre en lieu pour le vous faire cognoistre, & plusieurs autres choses importantes au bien de vostre seruice: On leue vne grande armée pour la prendre & la confiner dans Amboise, ou dans le Chasteau de Nantes, d'où ils en font les maistres, tenir tousiours Monsieur le Prince prisonnier, & V. M. dans l'exercice de la chasse, pendant qu'ils s'asseureront la moitié de vostre Royaume; car ils ont

des-lal'Isle de France, la Normandie, vne partie de la Picardie, & la Bretagne; mais il est dangereux qu'ils ne fassent cōme la Sansuë, qu'après estre bien pleine, elle creue : Mais on dit, veut-on empescher que le Roy n'ayme quelqu'un, non, mais à l'exemple du feu Roy qui cognoissoit bien les François, ne les esleuer pas si haut & si à coup, car ils se rendent insolents, & on ne les peut souffrir.

Et sur ce subiect V. M. est tres-humblemēt suppliee de cōsiderer les paroles du fils de Dieu couchées dās son sacré Testament: Or sçachez cecy qu'en derniers iours aduiendront des tēps perilleux, car les hommes seront auaritieux, vanteurs, orgueilleux, diffamateurs, sans loyauté, imposteurs de crimes, sans attrāpance, cruels, traistres, insolens, amateurs de voluptez, ayant la forme de preud'homme, qui se lancent ez Maisons, & de ceste sorte de gens il commande de s'en destourner, car leur follie sera manifeste à tous. 3. chap. de la 2. à Thimotée.

Cest ce qui a porté tous les bons François à ces festes de Pasques, qu'ils se sont mis en estat de grace, de porter leurs prieres tres-ardantes au Sauueur du Monde, pour inspirer V. M. à vouloir se remettre au ec sa Mere, la voir, ouyr ses plaintes, se despoüiller, comme on croit qu'elle aura fait des mauuaises & damnables impressiōs qu'on dit que des pestes d'Enfer on peu dōner à vostre Maieité, au preiudice de ses sincerēs intentiōs, ne souffrir pas qu'elle viue deshonorée, & que ces ennemis triomphe d'elle pres de vo-

estre personne, qui ne peut estre qu'au mespris
des commandemens de Dieu, enuers lesquels
vostre Maieité fait cognoistre vne grande pas-
sion en l'obeyssance d'iceux: & croire (SIRE)
qu'elle ne se portera iamais comme ces actions
passées, l'on fait cognoistre, à autres dessein que
de vous honorer & seruir. nostre Seigneur en
sera satisfait, vos peuples grandement contens,
rappeller vos vieux & antiens officiers de vostre
Couronne, tenir les Princes pres de vostre per-
sonne, soulager vos subiects le plus qu'il vous
sera possible, nous n'auôs point besoin de guerre
parmy nous, faire obseruer inuiolablement vos
Edits de pacificatiô sans souffrir l'infraction d'i-
ceux, regler vos finances en façon qu'ayant at-
taint l'aage de 25. ans, vous puissies auoir de quoy
repandre les desseins du feu Roy Henry le
grand, & quassisté de vos genereux François,
la terre habitable ne recognoisse pour Roy que
vostre Maieité, & apres auoir longuement re-
gné, aller iouyr au Ciel des palmes & des lau-
riers qui vous y attendent,

F I N.